

## **ՀՀ ֆինանսների նախարարություն**

### **Հարկային և մաքսային մարմինների գանգատարկման հանձնաժողով**

**Ո Ր Ո Շ ՈՒ Մ 58/3**

**30 դեկտեմբերի 2015 թ.**

Քննարկվեց «Արտյոմ և եղբայրներ» ՍՊԸ 04.12.2015 թ-ի գանգատը ՀՀ ՖՆ ՕՀՎ 05.10.2015 թ-ի թիվ 5101974 ակտի դեմ:

#### **«Արտյոմ և եղբայրներ» ՍՊԸ գանգատում բերված փաստարկները.**

2015 թ-ի հոկտեմբերի 5-ին ՕՀՎ 13-րդ բաժնի կողմից կազմվել է թիվ 5101974 ստուգման ակտը այն բանի կապակցությամբ, որ ՕՀՎ 25-րդ բաժնի աշխատակիցների կողմից տրամադրվել են տեղեկություններ այն մասին, որ «Հրաշք» ՍՊԸ-ին պատկանող Արարատի մարզի Ազատավան գյուղում գործող խանութում 30.07.2015 թ-ին հայտնաբերվել է «Արտյոմ և եղբայրներ» ՍՊԸ (այսուհետ նաև ընկերություն) պիտակներով արտադրված 0.5 լիտր տարողությամբ բնական քացախ 16 հատ՝ թվագրված 07.07.2015 թվականով: Ընկերության կողմից նշված փաստը չի ընդունվել և ՕՀՎ աշխատակիցներին տրվել է հայտարարություն, որ 2015 թ-ի մարտ ամսից մինչև հուլիսի 25 ընկերությունը քացախի արտադրությամբ չի զբաղվել, քանի որ արտադրամասի տարածքը (հասցեն՝ ք. Երևան, Նորագավիթ III փողոց, 17/1) ճանաչվել է գերակա շահ, որի հետևանքով ընկերությունը զրկվել է դրանից՝ հոսանքից, ջրից, կոյուղուց: Արդյունքում ստեղծվել է հակասանիտարական վիճակ: Միաժամանակ ընկերությունը նշում է, որ հարցուպատասխանի ժամանակ տրվել է բացատրություն, որ ընկերության կողմից չէր կարող տրամադրվել նշված արտադրանքը, քանի որ այդ ժամանակահատվածում ընկերությունը քացախ չի արտադրել: Բացի այդ, նշված արարքի համար, ըստ գանգատաբերի տեղեկությունների, արդեն իսկ տուգանվել է այն ընկերությունը, որի մոտ հայտնաբերվել է նշված ապրանքը:

Ելնելով վերոգրյալից՝ ընկերությունը խնդրում է չեղյալ համարել ՀՀ ՖՆ ՕՀՎ 05.10.2015 թ-ի թիվ 5101974 ակտը:

#### **ՀՀ ֆինանսների նախարարության հարկային և մաքսային մարմինների գանգատարկման հանձնաժողովի եզրակացությունը.**

ՀՀ ՖՆ հարկային և մաքսային մարմինների գանգատարկման հանձնաժողովը (այսուհետ նաև Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության:

Քննարկման ընթացքում նշվեց, որ ՀՀ ֆինանսների նախարարի 21.08.2015 թ-ի թիվ 5101974 հանձնարարագրի համաձայն «Արտյոմ և եղբայրներ» ՍՊԸ-ում իրականացվել է հսկիչ նշանների (դրոշմապիտակների) կիրառման ճշտության ստուգում: Արդյունքում կազմվել է ՀՀ ՖՆ ՕՀՎ 05.10.2015 թ-ի թիվ 5101974 ակտը:

Ակտի 1-ին կետով մասնավորապես արձանագրվել է, որ ՀՀ ՖՆ ՕՀ և ՆԱԳՎ ՕՀՎ պետի 29.07.2015թ-ի թիվ 1428738 որոշման համաձայն «Հրաշք» ՍՊԸ-ին /ՀՎՀՀ 04209291/ պատկանող Արարատի մարզ, գյուղ Ազատավանում գործող խանութում 30.07.2015թ-ին ՕՀՄ-ի շրջանակներում ՕՀՎ 25-րդ բաժնի աշխատակիցների կողմից իրականացվել է իրերի և փաստաթղթերի հետազոտում, որի արդյունքում հայտնաբերվել է «Արտյոմ և եղբայրներ» ՍՊԸ-ի /ՀՎՀՀ 02214148/ պիտակներով, որի վրա արտադրության ամսաթիվը նշագրված էր 07.07.2015թ., 0.5լ տարողությամբ բնական

քացախ 16 հատ, ընդհանուր արժեքով 1920 դրամ, որոնց վրա առկա չէին համապատասխան դրոշմապիտակներ: Ընկերության կողմից խախտվել է «Առևտրի և ծառայությունների մասին» ՀՀ օրենքի 9.2 հոդվածի պահանջները, ըստ որի ՀՀ տարածքում արտադրված և ՀՀ ներմուծված՝ շալցված, փաթեթավորված կամ ցանկացած այլ ձևով տարայավորված նույն հոդվածով ներկայացված աղյուսակում ներառված ապրանքների վրա օտարման ցանկացած փուլում դրոշմապիտակի առկայությունը պատահիր է, եթե օրենքով սահմանված համապատասխան ծածկագրով ապրանքային դիրքում ընդգրկվող կամ այլ փաթեթավորողի կողմից փաթեթավորված, շալցված կամ այլ կերպ տարայավորված են նույն փաթեթավորմամբ ու ապրանքային տեսքով, առանց քաշը /ծավալը/ փոփոխելու, մանրածախ առևտրի ոլորտում իրացման համար: Նշված խախտումն առաջացնում է պատասխանատվություն «Վարչական իրավախախտումների վերաբերյալ» ՀՀ օրենսգրքի համաձայն:

Վերոգրյալի կապակցությամբ հարկ է նշել, որ չնայած գանգատում բերված պնդումների, որ 2015 թ-ի մարտ ամսից մինչև հուլիսի 25 ընկերությունը գործունեություն չի իրականացրել և մասնավորապես քացախի արտադրությամբ չի զբաղվել, սակայն փաստն այն է, որ ՕՀՎ 25-րդ բաժնի աշխատակիցների կողմից «Հրաշք» ՍՊԸ-ին պատկանող խանութում 30.07.2015թ-ին իրականացված ՕՀՄ-ի շրջանակներում հայտնաբերվել է «Արտյոմ և եղբայրներ» ՍՊԸ-ի պիտակներով 0.5լ տարողությամբ 16 շիշ բնական քացախ, որոնց վրա համապատասխան դրոշմապիտակներ առկա չեն եղել: Պիտակների վրա կատարված գրառման համաձայն նշված քանակության քացախը «Արտյոմ և եղբայրներ» ՍՊԸ-ի կողմից արտադրվել է 07.07.2015թ-ին: Ընդ որում, ստուգումն իրականացրած անձինք նշեցին, որ խախտումն արձանագրվել է ինչպես սույն գործի վերաբերյալ կազմված համապատասխան փաստաթղթերի, այնպես էլ իրեղեն ապացույցի՝ «Արտյոմ և եղբայրներ» ՍՊԸ-ի պիտակներով 0.5լ տարողությամբ 16 շիշ չդրոշմապիտակավորված բնական քացախի, ուսումնասիրության արդյունքում:

Քննարկվող դեպքում «Արտյոմ և եղբայրներ» ՍՊԸ-ի կողմից խախտվել են «Առևտրի և ծառայությունների մասին» ՀՀ օրենքի 9.2 հոդվածի պահանջները, որի համար «Վարչական իրավախախտումների վերաբերյալ» ՀՀ օրենսգրքով նախատեսված է պատասխանատվություն:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի և «Մաքսային ծառայության մասին» ՀՀ օրենքի 37-րդ հոդվածի պահանջներով հանձնաժողովը

#### ո ղ ղ ո շ ու մ է՝

ՀՀ ՖՆ ՕՀՎ 05.10.2015 թ-ի թիվ 5101974 ակտը թողնել անփոփոխ, իսկ գանգատը՝ մերժել:

Սույն որոշմանը չհամաձայնվելու դեպքում այն ուժի մեջ մտնելու օրվանից երկու ամսվա ընթացքում կարող է բողոքարկվել տեսչական պալատի միասնական բողոքարկման հանձնաժողով կամ ՀՀ վարչական դատարան:

**Հանձնաժողովի նախագահ՝**

